

Xotin-qizlar va bolalarning huquqlari, qonuniy manfaatlarini himoya qilish Qonun jihatidan takomillashtiriladi

19/01/2024 - 17:34



Senatning qirq toʻqqizinchi yalpi majlisida “Oʻzbekiston Respublikasi Maʼmuriy javobgarlik toʻgʻrisidagi kodeksining 248-moddasiga qoʻshimchalar kiritish haqida”gi Qonun koʻrib chiqildi.

Taʼkidlanganidek, keyingi yillarda ichki ishlar organlarida xotin-qizlar va bolalarning huquqlari, erkinliklari hamda qonuniy manfaatlarini taʼminlash, ularning hayoti va sogʻligʻini muhofaza qilish, shaʼni va qadr-qimmatini himoya qilish, ularning maʼnaviy hamda jismoniy rivojlanishiga koʻmaklashish borasida tizimli ishlar yoʻlga qoʻyildi.

Oʻzbekiston Respublikasi Prezidentining hamda Hukumatining tegishli qarorlari bilan ichki ishlar organlarining huquqbuzarliklar profilaktikasi boʻlinmalarida voyaga yetmaganlar masalalari boʻyicha inspektor-psixolog va xotin-qizlar masalalari boʻyicha inspektor lavozimlari joriy etildi.

Tahlillar shuni ko'rsatdiki, ichki ishlar organlarining voyaga yetmaganlar masalalari bo'yicha inspektor-psixologlarida zarur vakolatlar mavjud emasligi voyaga yetmaganlar bilan bog'liq huquqbuzarliklar profilaktikasi yuzasidan o'z vaqtida chora-tadbirlar ko'rilishiga to'sqinlik qilib kelyapti.

Shu bilan birga, tazyiq va zo'ravonlikdan jabrlangan xotin-qizlarning davlat tomonidan himoya qilinishini ta'minlash borasida amalga oshirilayotgan ishlar samaradorligini yanada oshirish maqsadida himoya orderi talablarining bajarilishini nazorat qilish yuzasidan ichki ishlar organlari xotin-qizlar masalalari bo'yicha inspektorlarining mas'uliyatini kuchaytirish talab etiladi.

Mazkur Qonun bilan Ma'muriy javobgarlik to'g'risidagi kodeksning 248-moddasiga bolalarni tarbiyalash va ularga ta'lim berish bo'yicha majburiyatlarni bajarmaganlikda, jamoat joylarida tamaki yoki alkogol mahsulotini iste'mol qilganlikda, shuningdek, voyaga yetmagan shaxsni g'ayriijtimoiy xatti-harakatlarga jalb qilganlikda aybdor shaxslarni ma'muriy javobgarlikka tortish uchun ichki ishlar organlarining voyaga yetmaganlar masalalari bo'yicha inspektor-psixologlariga zarur vakolatlar berilishini nazarda tutuvchi qo'shimchalar kiritilyapti.

Bundan tashqari, ichki ishlar organlarining xotin-qizlar masalalari bo'yicha inspektorlariga tazyiq o'tkazgan va (yoki) zo'ravonlik sodir etgan yoxud ularni sodir etishga moyil bo'lgan shaxs tomonidan himoya orderi talablarini bajarmaganlik kabi ma'muriy huquqbuzarliklarni rasmiylashtirish vakolatlari berilyapti, deb xabar beradi Oliy Majlis Senati matbuot xizmati.

Senatorlar fikricha, ushbu Qonun ichki ishlar organlarining voyaga yetmaganlar o'rtasida huquqbuzarliklar profilaktikasiga, xotin-qizlar va bolalarning huquqlari hamda qonuniy manfaatlarini himoya qilishga doir faoliyati samaradorligini oshirishga xizmat qiladi.

Qonun senatorlar tomonidan ma'qullandi.
